

أحمد عبد الحميد

قصة
قصيرة

تعويذة الحياة



تعويذة الحياة

عندما تطاردك أساطير وحكايات القدماء

أحمد عبد الحميد

بين ريد للنشر الالكتروني

نوع العمل : قصة قصيرة

أسم العمل : تعويذة الحياة

أسم المؤلف : أحمد عبد الحميد

تصميم الغلاف : أحمد عبد الحميد

تنسيق وأخراج : أحمد عبد الحميد

الناشر : بين ريد للنشر الالكتروني

المدير العام : هلاء حسلى

الموقع الالكتروني :

www.beenread2020.blogspot.com

هذه نسخة مجانية وجميع حقوق النشر الورقى والالكتروني والمرئي والمسموع محفوظة للكاتب ، وغير مسموح بتداول هذا العمل بالقص أو النسخ أو التعديل أو التبرج من خلالها بأى شكل من الأشكال دون إذن كتابى من المؤلف شخصياً .

أهداء

إلى الأستاذة / هناء حسنى

وأ أسرة مبادرة ال 100 كتاب على الدعم الذى قدموه

لاظهار هذا العمل بهذا الشكل

أحمد عبد الحميد

مرحباً

انا (غادة ممدوح الفيومى) ، هل تتذكرون هذا الاسم ؟

هل يبدووا لاحدكم بأن الاسم مألوفاً ؟

نعم ، أنها هى

انا غادة زوجة طه والتي عشتم معها مغامرتها مع شيماء أو

لندعوها (سخت) وزمردتها الملعونة .

لقد اتيت اليكم اليوم لسببين ...

أولهما اننى اشتقت اليكم

أما السبب الثانى فهو هذا الخطاب يا اصدقاء ...

لا ، أنها ليست مغامراتى انا ، ولا حتى مغامرة لزوجى ، أو شيماء

وعزت ، أنها مغامرة لشخص آخر ، كتبها ووثقها فى عدة وريقات

وارسلها لى فى خطاب عاجل .

هل تريدون قراءة الخطاب ؟ ، حسنا ولكن قبل أن نشرع فى

قراءة الخطاب اريد ممن يشعر بالملل سريعا أن يصبر إلى نهاية

الخطاب ، واريد أيضا ممن يخاف من التماسيح أو يحلم بها كثيرا

أن يغادرونا ، فلا داعى للذعر بيننا .

ملحوظة صغيرة : الخطاب مكتوب باللغة العامية المصرية

والآن ، هل انتم جاهزون ؟

حسنا ... فلنبداً

الفصل الأول

الأستاذة / دينا

بعد التحية والسؤال عن صحتك

فى البداية حضرتك متعرفنيش ، لكن أنا اعرفك ، قرئت عن حضرتك فى مغامرة مع عصابه لتهريب الآثار ، وقرئت بحوثك عن مصر القديمة وعن حياة المصريين القدماء وأسلوبهم وعبادتهم ، بجد حببت أسلوبك فى الشرح وافتراضياتك المنطقية ، ودلوقتى أنا عندي مشكلة ملهاش حل للأسف ، بس قولت اخذ رأيك يمكن يكون عندك حل ، ولو مفيش عندك حل يبقى خلاص مش مشكلة أنا تقريبا اتأقلمت على الوضع اللي أنا فيه ، بس ياريت حضرتك تصدقيني وتصدق حكايتي.

خلينى الاول اعرفك على نفسي ، أنا أسمى (آدم عبد الستار) عندي 26 سنة و اعزب ... معايا دبلوم متوسط لكن قرئت كثير فى التاريخ الفرعونى بسبب الوضع اللي أنا فيه واللى بسببه بكتبك الجواب ده ، بشتغل فى تجارة الشمع والذهب والجلود مع ابويا ، موهبتى هى النحت ودى موهبة اتعلمتها من ابويا اللي هو اساسا اتعلمها من جدى ، أنا بعتبر نفسي وسيم لدرجة معقولة ، طبعا اكيد عرفتى محل سكنى من الجواب والمحافظة اللي أنا عايش فيها .

واللدى كان مهندس بترول وكان شغال فى دولة من دول الخليج

وقعد هناك لمدة 10 سنين واتجوز واحدة فرنسية كانت شغاله معاه ، لكن انفصل عنها لما قرر ترجع مصر بسبب رفضها أنها ترجع وتعيش معاه فى مصر كانت عاوزه تعيش فى فرنسا ، لكن تقدرى تقولى أن والدى حس أن الغربة بدأت تقتله والحين لجذوره بينادى عليه .

ورجع مصر ومعاه ثروة معقولة ، واشترى حته أرض كبيرة فى مدينة الفيوم ، حته الأرض دى كانت ما بينها وبين بحيرة قارون الشهيرة حوالى 5 كيلو وبنى بيت كبير جدا واسع وجنينة مليانة ورد وزرع ، ولما قرر يتجوز قابل امى .

امى بقا اطيب ست ممكن تقابلها فى حياتك ، تخيلى حضرتك أن امى كانت بتدرس فى كلية الطب وفى السنة الأولى قررت انها شبعت من التعليم ، كانت دايمما بتقول أن الست مهما وصلت بعلمها ودرست فى الآخر بيتها هو اللى هيحتاجها ، منطق غريب ممكن يرفضه ستات العالم كله ، لكن المنطق ده كان صحيح بنسبة 100% بالنسبالها ، وخصوصا انها كانت يتيمة ، امها اتوفت وهى بتولدها ، فعوضت حرمانها من حنان الام فى اولادها ، عاوز اقولك أن امى جواها حنية تملى الدنيا كلها وعمرها ما رفضت لنا طلب ، ابويا دايمما يقول عنها أنه لو كان بيدور على واحدة فى حنيتها مكنش هيلاقى ابدا .

نيجى بقى لاختى الصغيرة ، اسمها (آية) وهى فعلا آية ، بنوته فى خمسة ابتدائى ، الملاك اللى جه البيت فى وقت متأخر شوية ، كنت بضحك اول ما اتولدت بسبب فرق السن ما بينا ، دايمًا باعتبارها بنتى ، ولو حد زعلها أو زعلها تلاقينى المدافع الاول عنها .

انا عارف انى طولت عليكى ، بس انا حبيت اعرفك على اسرتى الصغيرة ، لأنهم فى النهاية جزء من حياتى وجزء كمان من حكايتى . حياتنا تقدرى تقولى عليها انها كانت عادية جدا وهادية لدرجة الملل لحد ما ظهرت (دينا) .

فى يوم كنت رايج اجيب اختى (آية) من المدرسة وهناك لاقتها واقفه مع استاذتها الجديدة بتتعرف عليها ، سلمت عليها باحترام وأخذت اختى ورجعنا .

عاوز اقولك أن (دينا) كانت جميلة وهادية وطبعا مجرد ما سألت اختى عنها عرفتني أنها استاذة العلوم الجديدة وأنها اصلا من محافظة المنيا وجت الفيوم من يومين وعاشة فى سكن المعلمات على أطراف المدينة .

عقلي وقلبي كانوا طول ما احنا راجعين متعلقين وييفكروا فى (دينا) .

وبقيت كل يوم اخذ اختى الصغيرة اوديتها المدرسة وأرجع اخدها

تانى بعد المدرسة علشان أشوف (دينا) ، لحد ما جه اليوم اللى قررت انى اتكلم معاها .

فى يوم رحت المدرسة بحجة انى عاوز اطمئن على مستوى اختى (آية) فى الدراسة ، انا طبعا عارف ان المفعوضة متفوقة وبتطلع كمان من الأوائل كل سنة ، لكن كان كل اللى يهمنى وقتها انى اتعرف على (دينا) .

وقابلت دينا .

- صباح الخير

قلتها وانا محرج جدا ومتوتر

- صباح النور

رديت عليا بابتسامة جميلة جدا

- انا ادم اخو آيه عبد الستار ... التلميذة اللى فى فصل 2/5

- عارفها دى بنت شاطرة جدا

- طيب ومستواها عامل ايه ؟

- يا استاذ آدم اخت حضرتك ذكية جدا ، بتفهم المعلومة من اول مرة

قالتها وهى بتلم كراستها وحطت شنطتها الصغيرة على كتفها وقالتلى :

- انا عندي حصة فى فصلها دلوقتى ، تحب تبص عليها ؟

طبعاً وافقت و روجت معها ، وكان قلبي هينط من مكانه بسبب
الفرحة ، واطمنت على اختي اللي مجرد ما شفتني فرحت جداً ،
ومشيت ورجعت تاني بعد المدرسة علشان اخذ اختي (آية)
ونروح .

لما رجعنا البيت لاقيت اختي بتخبط عليا الباب ودخلت وقالتلى ،
أن أبله (دينا) سألتها عليا ، وعن سنى وشغلى وطبعاً اختي
حكّلتها كل حاجة عنى ، وقبل ما تخرج غمرت وقالتلى :
- ابقى تعالى المدرسة اسال عليا من الوقت للتانى
كنت فرحان جداً ، ومع مرور الأيام اتطورت علاقتى مع (دينا)
وصارحتها بحبى ليها ، طبعاً وشها لون احمر والخجل اتملك
منها فعرفت أنها بتبادلنى نفس الحب ، وقررت افاتح امى فى
الموضوع ، طبعاً امى رحبت جداً ، لكن ابويا اعترض وسألنى
وقال :

- هى تعرف أسلوب حياتنا يا آدم ؟ تفكر لو عرفت هتقدر تعيش
ولا هتخاف وتسيبك ؟

كلام ابويا بالرغم انه حقيقة لكن كان عامل زى الحجر اللي وقع
على قلبي وعقلي وفوقنى لحياتنا ، وبقى اهم سؤال بيشغل
عقلي ، ياترى دينا هتقبل أسلوب حياتنا ؟

اتملكنى اليأس والمرض وفضلت نائم فى السرير 5 ايام مريض

وحراراتى عاليه جدا ... امى وابويا كانوا عارفين أن المرض مكنش
عضوى ده كان نفسى ، وهنا قررت امى أنها تتكلم مع ابويا فى
موضوع (دينا) ، لكن ابويا رد بعصبية وقال :
- ابنك لو اتجوزها وبعد كده عرفت بسرنا شكلنا هيبقى عامل
ازاى قودام أهلها ؟ ... دخول بيوت الناس مش حاجة سهلة لازم
واحنا داخلين بيتهم نكونوا صادقين ... احنا بناخد واحدة من أهلها
علشان نكرمها وسطنا مش علشان نغشها أو نسبب ليها الخوف .
ردت امى وهى بتحاول تهدى ابويا وقالت :
- أهدى يا ابو آدم ، أهدى
وبعد شوية قالتله تانى :
- طيب ايه رايك نعزمها على الغدا وبعد الغدا هقعده معاها
واحكيلها كل حاجة ... السر بتاعنا مبيقتلش
رد ابويا بسرعة وقال :
- لكن سيسبب الخوف
- هتتعود عليه
- ولو رفضت ؟
- ساعتها هيبقى مسألة قسمة ونصيب .
وفعلا قدرت امى بعد إصرار والحاج شديد على (دينا) أنها تعزمها
على الغدا عندنا فى البيت .

وجهرت أمى سفرة مليانه خيرات ، وطبعا كانت (آية) اشيك واحده
فينا ، استاذتها بقى واول مرة تيجى البيت.
وانا ؟

انا بقى كانت حالتى لاتسر عدو ولا حبيب ، محتار ألبس ايه ولا ايه ،
ولما تيجى هعمل ايه وهتكلم معاها ازاي وفى ايه ؟
والأهم من كده ... لما أمى تحكلها عن سرنا ، ياترى هيبقى رد
فعلها ايه ؟

ووصلت (دينا) مع أبويا اللى أصر أنه يروح يجيبها من سكنها
علشان متوهش فى السكة وخصوصا انها غريبة عن محافظتنا
ومتعرفش لسا المناطق والشوارع كويس.
وبعد السلام والترحيب والعصير اللى هو " واجب الضيافة الاول " ،
والدردشة بين (دينا) و (أمى) و (آية) وترحيب ابويا ليها وسؤالها
عن ابوها و أهلها ، قررت أمى أنه جه وقت الغدا ، وقعدنا كلنا
على السفرة علشان ناكل ، لكن دينا كان الخجل لسا متمكن منها
فأكلت حاجة بسيطة وأستأذنت أنها عاوزة تعرف طريق الحمام
علشان تغسل ايديها .

حاولت أمى مع (دينا) علشان تخليها تاكل كويس وأنها تشيل
حاجز الخجل شويه ، لكن هى قالت انها فعلا شبعت وخصوصا
انها ماشية على ريجيم قاسي شويتين ، واضطرت أمى أنها توصف

لها طريق الحمام ... قالتها أنها هتخرج من غرفة السفارة هتلاقى
طرقه تدخل شمال هتلاقى باب الحمام هناك .

وخرجت دينا من غرفة السفارة ...

ووصلت للطرقه ...

وبدل ما تدخل شمال ، دخلت يمين ...

وهناك لاقت الباب الملعون موجود مستنيها

وبعد 5 دقائق سمعنا صرخة (دينا) ، جريت علشان الحقها ...

لاقيتها خارجة من عند الباب الملعون وبتصرخ ، شافتنى صرخت

تانى فى وشي وزقتنى وطلعت تجرى بره البيت .

طلعت أجرى وراها علشان اشرحلها كل حاجة لكن رفضت تسمعنى

وكل اللى طالع عليها جملة واحدة بس

"أنتم عاوزين تقتلونى"

وطلعت تجرى على الطريق ، حاولت الحقها علشان اشرحلها

وتسمعنى لكن وقفت تاكسي ومشيت .

رجعت البيت وانا بلعن الحياة والظروف اللى انا فيها ، قوليلى يا

استاذة (غادة) ليه الواحد بيتحاسب على حاجة هو طلع لقي نفسه

فيها ؟

مفتحتش كلمة واحده مع ابويا أو امى اللى كانوا فعلا زعلانين على

حالى وطلعت اوضتى .

بعد ساعة اتفاجئنا بأن (دينا) جت تانى لكن المرة دى كان معاها
قوة من البوليس ، الأستاذة اتهمتنا أن احنا مرييين وحوش فى البيت
وكنا عاوزين نرميها للوحوش دى .

طبعا ظابط الشرطة مكنش مصدق القصة ، لكن مع انهيار (دينا)
وحالتها النفسية اضطر يفهم اكثر .

ابويا طبعا رحب بيهم ودخلهم البيت ولما الظابط سألها عن الباب
اللى دخلت منه وشافت الوحوش إياها ، وصفتله مكان الباب .
لكن الباب اختفى ...

فعلا الباب كان اختفى تماما وكأنه مش موجود ...
الظابط طلب من ابويا أنه يفتش البيت وابويا وافق فى هدوء ،
وراحت العساكر تفتش وبعد شويه رجعوا كلهم وقالوا إنهم ملقوش
حاجة غير (حرياية) صغيرة موجودة فى صندوق ازاز فى اوضة اختى
(آيه).

الظابط وبخ دينا وهددها بأنه هيعمل محضر ازعاج سلطات لكن
ابويا هدى الظابط ومشوا ...

وبعد أيام عرفت أن (دينا) سابت المدرسة والفيوم كلها ورجعت
تانى على بلدها فى (المنيا)

وفى يوم دخلت (آية) اختى عليا فى الاوضه وقالتلى :

- هو انت لسا زعلان يا آدم ؟

ابتسمت ابتسامه باهته وبوست رأسها فى حب ، بصتلى وقالت فى
لامبالاة :

- وفيها ايه لما يكون بيتنا فيه تماسيح ؟
وخرجت من الاوضه ...

فيها ايه لما يكون بيتنا فيه تماسيح ؟
سؤال مهم جدا ، فيها ايه لما يكون فى تماسيح فى بيتنا ؟ ما فى
ناس بتربي كلاب ، وفى ناس بتربي تعاين وأفاعى ، وفى ناس بتربي
اسود ...

لكن الفرق ما بينهم وما بينا أن التماسيح بتاعتنا غير اى تماسيح
أو اى حيوان تانى ، هى فعلا بتتنفس وبتتحرك لكن فى النهاية هى
تماسيح من شمع .
وهو ده السر

الفصل الثاني

السر

القصة منتهت على كده ، ابويا بعد ما اتجوز امى كانت حياتهم هادية جدا وكان ابويا عاوز يستثمر أمواله فى مشروع صغير ، لكن مكنش اخذ قرار نهائي عن فكرة المشروع وبعد فترة صغيرة امى لاحظت وجود باب لونه بنى مكتوب عليه نقوش بالهيروغليفية ، الباب ده كان موجود فى الصالة وطبعا الباب ده مكنش موجود من ثوانى فانت .

امى حست بالخوف وطلعت تجرى على ابويا علشان تحكيه ولما ابويا رجع معاها ملقاش اى حاجة ، لكن امى اقعدت تحلف أن كان فى باب ، ابويا اعتقد فى الاول أنها خيالات ، وهدى امى وعدى اليوم دة بعد كده عادى جدا .

وبعد يومين امى دخلت المطبخ علشان تطلع ازايزة العصير علشان تصب كوبيتين ليها ولا بويا ، وبعد ما حطت العصير تانى فى التلاجة لاقت الباب ظهر تانى ، باب موجود جوا الحيطه وكأنه موجود بقاله زمن ، امى قررت المرة دى أنها تتحدى نفسها وتشوف الباب ده حقيقة ولا خيال ؟ فتحت الباب لاقت وراءه سلم بينزل لتحت ، وبعد ما نزلت خطوتين خافت بسبب الضلمة فرجعت تانى بس المرة دى مطلعتش تجرى علشان تقول لا بويا .

بعد ما طلعت سابت الباب مفتوح علشان تتأكد أن الباب هيختفى تانى ولا هيفضل موجود ، وأخذت العصير وراحت اقعدت مع ابويا ، وحاولت متكلمش معاه فى الموضوع ده ، وبعد شوية رجعت تشوف الباب لسا موجود ولا اختفى .

وكان هناك موجود ، والباب مفتوح والضلمه جواه ، امى بعد ما
اتأكدت أن الباب حقيقة ومش خيال قفلت الباب تانى ومجرد ما اتقفل
اختفى وكأنه مكنش موجود .

امى عرفت ساعتها أن الباب ده مسحور ووراه سر كبير ، امى جرت على
ابويا وسألته :

- هو انت لما جيت تشتري حته الارض دى كان عليها ايه ؟

ابويا قالها إن كان على حته الارض دى بيت من اوضه واحده وكان قديم
ومبنى من الطين ولما جه بينى البيت بتاعه اضطر أن هو يزيل البيت
ده ، امى سكنت شويه وبعدين قالتله :

- طيب ملاحظتش حاجة فيه وانت بتهدده ؟

ابويا بصلها اوى وقالها :

- حاجة زى ايه مثلا ؟

- زى مثلا رسمه غريبة ، نقش ، أو باب

ابويا قالها لا وقالها كمان أن الاوضه دى مكنش ليها باب وحتى سقفها
كان واقع .

فضلوا شوية ساكتين وراج ابويا سألها :

- بس انتى بتسالى ليه ؟

امى اتمالكت أعصابها وبصت فى عين ابويا قوى وقالتله :

- أصل الباب ظهر تانى

كان ممكن اى راجل تانى فى وضع ابويا ميصدقش الكلام ده ، لكن
ابويا صدق امى لأن عندها كانت مبيينة اوى أنها بتقول الحقيقة .
ابويا حب يستفسر منها اكثر ، فحكتله كل اللي حصل معاها فى
المطبخ وحكتله برضه بأنها لما رجعت وبمجرد قفلها للباب الباب
اختفى ، ابويا هنا قرر أنه يفهم سر الباب ده .

وبعد كام يوم ، امى صحت من النوم الصبح ، وراحت على الحمام زى
اى حد بيقوم الصبح ، واكيد حضرتك عارفة يا استاذة عادة أن ساعتها
محدثش بيبقى مركز ، وبمجرد ما امى فتحت باب الحمام شافت الضلمة
والسلم اللي بينزل على تحت .

امى صرخت بصوت عالى ، وبصت على الباب الخشب بتركيز ، لاقته هو
الباب اللي عليه نقوش بالهيروغليفية ، طبعا ابويا جه جرى على صراخ
امى ، كان بيعسب أن امى لاقت فار فى المطبخ ، معظم ستات البيوت
بتصرخ فى المطبخ أو الحمام بسبب الفار أو الصرصار ، صح ؟

لكن ابويا اكتشف أنه واقف اودام باب تانى ، باب مش بيورى للحمام ،
باب بيورى لمكان تانى خالص ، بس ابويا كانت دماغه بتفكر بسرعة .

أمر امى أنها تفضل فاتحة الباب وتفضل مكانها ، وهو جرى على
الجنينة وجاب شومه محترمه ولف عليها قماش كتير وحطها فى
البنزين ، اكيد انتى فهمتى كان هيعمل بيها ايه

ورجع ابويا تانى وولع فى القماشة بالولاعة بتاعته وقرر أنه ينزل يشوف

السلم ده بيودي فين وأمر امى أنها تقف ومتنزلش معاه ، لكن مع إصرار
امى أنها تنزل وتشوف فى ايه وان ليها الحق أنها تعرف ايه اللى موجود
تحت بيتها ، ابويا وافق .

ونزلوا

السلم كان حلزونى ، سلم حجر وكان ما بين كل خمس درجات تلاقى
مشعل محطوط على الحيطه ، ابويا وهو نازل كان بيولع كل شعله
يلاقىها ، لحد ما وصلوا للقاغ .

لقوا نفسهم فى اوضه كبيرة جدا مساحتها 100 متر فى وسط الاوضة
دى كان فى بحيرة مياة صغيرة على شكل دائري ومتوصله بسرداب
زى مواسير المجارى الكبيرة ، السرداب ده هو اللى كان بيوصل
المية للبحيرة دى ، وشافوا على جدران الاوضة دى نقوش فرعونية
وهيروغليفية كثيرة ، ابويا وامى كانوا مستغربين جدا من المكان ، وقعد
ابويا يدور على المشاعل علشان تنورله اكر ، وبعد ما ملامح المكان
ظهرت كويس ، امى شافت كوم من مادة غريبة موجودة على الزاوية
اليمين للاوضة ، واكتشفوا أنها شمع ، بس شمع مركز اقوى وانصف
شمع ممكن تشوفيه فى حياتك ، ابويا برضه لاحظ وجود تابوت فى
الزاوية الشمالية للاوضه جنب السلم الحلزونى على طول ولما راحوا
هناك اكتشفوا أنها 6 توابيت فرعونية بكنوزها كامله متفتحتش ، ابويا
وامى فرحوا جدا فى الاول ، لكن بعدها ابويا خاف .

بتسأليني خاف من ايه ؟

طبعا من لعنة الفراعة ... اللعنة اللي دائما بتمس حد بسوء مجرد
ما بتنبتش قبور الفراعة ، اللعنة اللي موتت وقتلت ناس كتير ، اكيد
حضرتك تعرفي اكثر منى عن لعنة الفراعة ، صح ؟

وهنا قرروا أنهم ميجوش جنب التوابيت ولا حتى كنوزهم ، وفهموا أن
الباب ده سر وان المفروض محدش يعرف عنه حاجة ، لأن لو مكنش سر
أو امانه مكنش بابه هيبقى مسحور بالطريقة دي .

بس المحير واللى شغل امى اكثر ، ايه سر كمية الشمع الكثيرة دي ،
وهنا حصلت حركة غريبة فى البحيرة ، وطلع منها تمساح كبير ، واول ما
التمساح شافهم طلع يجرى عليهم .

امى صرخت بصوت عالى وطلعت تجرى اودام ابويا اللي مقدرش
يتحرك من مكانه من كتر الخوف ، وفجأة هجم التمساح على ابويا
ووقعه فى الارض ، وقعد يلحس فى وش ابويا بلسانه
يلحسه ؟

ايوه يلحسه ، زى ما الكلاب بتلحس وشوش صحايبها علشان تصحيهم
أو وهى بتلعب معاهم .

وبعدها التمساح سابه ونزل الميه تانى ، ابويا وقف على رجليه
مستغرب وهو مش فاهم فى ايه ، امى كانت شايفة اللي بيحصل
وكانت هى كمان مش فاهمة وراحت قايله :

- هو ده تمساح ولا كلب ؟

ابويا برضه مكنش لاقى إجابة ، وبعد شويه رجع التمساح تانى ومعه
5 تماسيح اصغر منه فى الحجم ، لكن المرة دى معمولوش حاجة ،
راحوا بصوا على التواييت وكأنهم ييطمنوناهم ورجعوا لابويا وبقوا
يتمسحوا فيه .

ابويا بدأ يلمسهم ويتعامل معاهم كأنهم حيوانات أليفة ، وفعل
استجابوا .

هنا بقى كانت الحيرة فى عقل امى ، ايه قصة التماسيح دى وايه سر
المكان ده اساسا ؟

وبعد ما طلّعوا وقفلوا الباب ، طبعاً حضرتك عارفة ايه اللى حصل ،
اكيد الباب اختفى

قعد ابويا وامى لمدى اسبوع يقرأوا كتب عن التاريخ المصرى القديم
علشان يفهموا ايه سر المكان ده ، واكتشفوا الاتى

أن بحيرة قارون مش دى هى المكان اللى اتخسف فيه قارون الأرض ،
لا البحيرة دى موجودة من زمان جدا من قبل حتى يوسف ويعقوب
و ابراهيم عليهم السلام ، البحيرة دى اساسا موجودة فى منطقة
تصدعات ارضيه ، ولأن البحيرة ليها شكل (قرون) ومع نطقها بالعامية
المصرية بقت (قارون) .

وان القصر اللى موجود على مشارف البحيرة وبنقول عليه (قصر قارون)

هو طبعا مش قصر قارون ، القصر ده اساسا معبد معبد الإله (سوبك) اللى كانوا بيقدسوه المصريين القدماء ، وسوبك ده المصريين كانوا مجسدينه فى شكل جسم بنى ادم ورأس تمساح .

ابويا وامى افترضوا أن الاوضه اللى اكتشفوها دى هى المكان اللى كانت بتعيش فيه التماسيح اللى بيقدسوها المصريين القدماء وان التواييت دى لمجموعة من الكهان حبوا أنهم يندفنوا جنب التماسيح اللى كانوا بيقدسوها علشان يحرسوهم فى العالم الآخر ، بس ابويا وامى مكنوش متأكدين من صحة الافتراضية دى

علشان كده حبوا يتأكدوا عملى واستنوا لحد ما الباب ظهر تانى ونزلوا ، لاقوا التمساح الضخم نايم ، بس التمساح حس بوجودهم وصحى ولف حوالين امى وابويا لغتين ، وهما كمان طبطبوا عليه وراج قعد تانى فى مكانه .

هنا ابويا قرر يشوف رد فعل التمساح ، وراج لحد التواييت ومسك طبق مصنوع من الذهب وقعد يبص عليه فى انبهار ، امى طبعا كانت بتراقب رد فعل التمساح ، والتمساح كان هادى جدا بالرغم انه كان يراقب ابويا ، ومجرد ما ابويا حط الطبق الذهب تحت هدومه التمساح كشر على أسنانه ، هنا ابويا وامى فهموا أنهم ممنوع ياخدوا اى حاجة تخص أصحاب التواييت ، وابويا حط الطبق الذهبى مكانه وطلعوا تانى للبيت .

بالرغم أن ابويا وامى كان معندهم شىء أى معلومات أو خلفية فى إالى شافوه إلا أنهم مشوا على افتراضيات ذكيه جدا ، والدليل القصة اللى هحكىها لك دلوقتى .

بعد شهرين من إالى حصل كانت الالفه حصلت ما بين التماسيح وما بين امى وابويا ، الغريب أنهم لاحظوا أن التماسيح دى مبتكلش ، بالرغم أن فى سمك فى البحيرة ، والسمك ده مبيقولش بالعكس ده كان بيزيد وكمان ابويا كان بياخد من السمك ده علشان امى تشويه ويتغدوا بيه ، حاول ابويا كتير يرمى للتماسيح دى سمك علشان يشوفهم مرة واحدة بياكلوا ، لكن مكنوش بيكلوهم .

وأخر ما زهق ابويا راج اشترى خروف ونزله للتماسيح ، لكن محدش هجم عليه ، بالعكس بعد أربعة أيام ابويا نزل لاقى الخروف عمال ينط ويلعب مع التماسيح الصغير .

ابويا بقى يضرب كف فى كف مش فاهم فى ايه ، وفضل اللغز ده مش عارف يحله ابدا ، لحد ما ابويا حس ان فلوسه بردأت تقل وخصوصا بعد ما امى بشرته أنها حامل فىا ، وهنا رجع يفكر تانى فى مشروع يعمله ، وجتله فكرة ، الفكرة أنها يستفاد من كمية الشمع الكثيرة اللى موجودة تحت عند التماسيح ، اكيد التماسيح مش هتعارض ، هو ممنوع عليه التواييت والكنوز لكن مجربش حكاية الشمع ، وفعلا استنى لحد ما الباب ظهر تانى ونزل واخد كمية شمع كبيرة اودام 5 تماسيح ومحدث

فيهم هاج أو غضب أو كشر على أسنانه ، بالعكس ده أضخم واحد
فيهم ضرب بديله كمية شمع كبيرة كانت متحجرة وكسرها علشان ابويا
مكنش قادر يشلها ، حضرتك متخيلة معايا المنظر ؟
وفعلا ابويا باع كمية الشمع اللي اخدها وكسب فيها مبلغ محترم
بسبب جودتها ، وبعدها بفترة ابويا نزل تحت وعمل لكل تابوت غرفة
مخصصة ليها جنب السلم الحازوني وسدها بالطوب وقال (ان السر
ده جه لحد عندي علشان احافظ عليه واحميه وانا قدّها ، لكن معرفش
اللى هيلاقيه بعدينا ممكن يعمل ايه) ، التماسيح لما طلعت من
البحيرة واكتشفت اللي ابويا عمله ، وقف كل تمساح اودام غرفة كاهن
ومع بعض وفي لحظة واحدة سجدوا لابويا براسهم كأنهم بيشكروه ،
وراحوا كلهم فاتحين بوقهم ، تفكرى ليه عملوا كده ؟
علشان سبيكة الذهب

كان جوا بوء كل تمساح منهم سبيكة ذهب ، وكانوا بيقدموها لابويا
وكانها مكافأة على مساعدته ليهم فى حماية التوايت واصحابها .
وفضل ابويا يبيع الشمع على مراحل متفاوتة ، وبقت التجار وأصحاب
المصانع يعملوا اتفاقيات ويدفعوا عربون مقدم علشان يلحقوا ياخدوا
حصتهم لما مصنع ابويا (على أساس انه مصنع) يخلص كمية الشمع
المطلوبة واللى مفيش زيتها فى السوق .

وشرفت انا ، ويوم ما جيت للدنيا ، ابويا شلنى ونزلنا تحت ، حب يخلى

التماسيح تعرفنى وتعرف رىحتى وتعرف أن انا هكون المسؤول الثانى
عن سرهم بعده .

وبعد أيام مات اكبر تمساح فيهم ، أبويا كان نازل كعادته علشان يقعد
تحت شويه ، لكن لاقى التمساح قاعد اودام البحيرة وكان فى دموع
بتنزل من عينه ، أبويا حس ان فى حاجة أو أنه حزين لكن اكتشف أن
فجأة التمساح مبقاش يتنفس ومات ، أبويا حزن شوية ، لكن اتفاجأ
بمشكلة اكبر ، هيودى جثة التمساح ده فين ؟

هيدفنه فى مكانه ؟ ... بس الأرض حجرية وصعب جدا يكسرها
طيب يدفنه فى الجنينه ؟ ... بس برضه مش هينفع حجمه كبير جدا
وميقدرش أبويا وامى مع بعض يشلوه ، ده لازم على الأقل 10 انفار ،
والمفروض ده سر محدش يعرفه .

طيب يرميه فى البحيرة ؟ .. برضه ثقيل

ولو سابه مكانه جتته هتعمل ريحة مع الوقت ، طيب يعمل ايه ؟
أبويا جاتله فكرة ... هى مشمنزة شوية لكن مفيش حل غيرها ، وهى أنه
يقطع الجثة ويشلها يدفنها فى الجنينة ، وفعلا طلع أبويا يجيب من
المخزن بتاعة اللى بيشيل فيه حاجته المنشار الكهربائي وشوية كياس
سودا .

لكن هنا بقى فى سؤال مهم أبويا مفكرش فيه ... (التماسيح اللى كانت
عايشه فى المكان ده قبل ما أبويا يكتشفه ... لما كانت بتموت كان

بيحصلها ايه ؟ ... المكان لما ابويا وامي اكتشفوه مكنش فيه ولا
عضمه واحده .. ولو حتى عضمة فرخة واحدة)

ده بقى اللي ابويا اكتشفه لما جاب المنشار الكهربائي والكياس ...
لاقى مكان التمساح شمع ، ايوه ... الشمع اللي كان مالى المكان
ومحدث فاهم سره ، التمساح بعد ما مات اتحول لشمع ، وابويا لاقى
فوق الشمع الجلد بتاع التمساح ، ولعلمك جلد التمساح ده غالى
جدا وفوق كده كمان لاقى سبيكة ذهب وكأن التمساح كان بيشكره على
رعايته ليه .

وبعد يومين وابويا بيطلع شوية شمع علشان يجهز طلبية تاجر ، لاقى
حاجة بتتهز تحت شوية شمع متكسرين كانوا موجودين على جنب ،
لاقى تمساح صغير ، تمساح كانه لسا طالع من بيضته حالا .
وابويا هنا فهم السر ، التماسيح دى معمولة من الشمع وفى تعويذة
معموله ان لو حد فيهم مات ييجى واحد غيره ، وكأنها دورة شغالة ليوم
الدين .

وبعد عشر سنين بقى ابويا اكبر تاجر شمع وجلود وذهب فى مصر كلها
وهو ده بقى السر ...

لكن مش هى دى المشكلة ...

الفصل الأخير

مشكلتي

المصريين القدماء سابوا لنا قصص وأساطير على البرديات
وجدران المعابد والمقابر كثيرة جدا ، فى بعض الناس اعتبرها مش
حقيقية وأنها نوع من أنواع الادب ، وده اللي انا كنت معتقده فى
البداية قبل ما اتعلم قراءة اللغة الهيروغليفية و الديموطيقية
اشهر نوعين كتابة استخدمهم المصري القديم .

هتسالىنى اتعلمت ازاي ؟

خلينى احكلك من البداية ، بعد ما وصلت لسن ال 16 أو ال 17
كنت شبعنت من التعليم زى ما كانت بتقول امى ، لكن كان تفكيرى
دائما فى السر اللي موجود تحت بيتنا ، كل الافتراضيات والنظريات
اللى حطوها ابويا وامى كانت معظمها مش كامله ، زى مثلا ليه
التماسيح من شمع ؟ وايه سر المومياوات الموجودة ؟ ومكنش
اودامى غير حاجة واحدة اقدر افهم قصة المكان ده وهى النقوش
والكتابات الموجودة على جدران المكان ، الموضوع فى البداية
كان صعب وعايز اقولك لحضرتك انى استعنت باكثر من 20 كتاب
ومرجع علشان اتقن الهيروغليفية فى البداية ، وبعدها بدأت افهم
السر اكثر .

اكيد حضرتك فهمتى أن المكان بيحتوى على 6 تماسيح من الشمع
لكن بيتحركوا ويبتنفسوا زى التماسيح العادية بالضبط، ولو حد

فيهم مات بيجى مكانه واحد من الشمع مرة ثانية .
لكن ايه هى قصة التماسيح دى ؟ وليه من الشمع ؟
ده اللي انا اكتشفته

اكتشفت وجود 6 قصص مختلفة لكل تمساح فيهم ، وكل قصة
تمساح فيهم حصلت فى زمن مختلف عن التانيين ، انا مش هقدر
احكيلك القصص كلها توفيراً للوقت ، لكن هحكلك قصة منهم ،
ممکن تكونى حضرتك سمعتى أو قرئتى عنها قبل كده .
القصة بتحكى وتقول أن الملك (نب كا) كان له مستشار اسمه (أوبا
أونر) وكان كمان كبير الكهنة المرتلين ، و كان متجوز شابة جميلة
حبت واحد من سكان المدينة وبدأت فى مراسلته عن طريق واحدة
من الخدمات وكانت بتبعث معاها هدايا لإغرائه لغاية ما إستسلم
لها

وفى يوم من الايام العشيق قال لزوجته (أوبا أونر) بأن جوزها
بيمتلك بيت على حافة بحيرة وعرض عليها أنهم يروحوا للبيت ده
علشان يقضوا يوم لطيف فيه ، طبعا الزوجة بعثت لخادم البيت
تأمره بتجهيز البيت وتنظيفه لأنها رايحة البيت ده علشان تقضى
اليوم فيه ، وفعلت راحت الزوجة وعشيقها وقضوا اليوم فى شرب
وسعادة ولما حان وقت الغروب العشيق راح البحيرة علشان

يستحمى ووقفت الخدامة الخاصة بالزوجة علشان تخدمه
طبعا خادم البيت شاف كل اللي حصل وتانى يوم الصبح راج
لسيده الكاهن (أوبا أونر) وحكاه كل اللي حصل من الزوجة
والعشيق ، فتصدم الكاهن وغضب لكن حاول يتمالك نفسه شوية
وقعد يفكر ازاى ينتقم منهم ؟

وبعد تفكير أمر الكاهن خادم البيت أنه يجبله الصندوق المصنوع
من الذهب والأبنوس الموجود فى البيت وقدر بالادوات والحاجات
الموجودة فى الصندوق أنه يعمل تمساج من الشمع طوله حوالى
سبعة أشبار وقال عليه تعويذة وبعدين امر التمساج الشمع أنه
يقبض على اى حد يستحمى فى البحيرة وأمر خادم البيت أنه
ينزل التمساج فى البحيرة بعد ما ينزل العشيق علشان يستحمى
بعدها بكام يوم بعثت الزوجة الخائنة لخادم البيت علشان يجهزه
وراحت الزوجة للبيت وكعادتها أخذت معاها العشيق والخدمة ،
وبعد ما قضوا اليوم فى مرج وشرب وعريضة ورذيلة .

جه وقت الغروب وراج العشيق للبحيرة علشان يستحمى راج
خادم البيت منفذ أمر الكاهن (أوبا أونر) نزل التمساج المصنوع من
الشمع للبحيرة وفى الحال اتحول التمساج المصنوع من الشمع
وطوله سبعة أشبار إلى تمساج حقيقى طوله سبعة متر وقبض

على العشيق وغاص بيه لقاع البحيرة

فى الوقت ده كانت الخدامة مستنية أن العشيق يخرج من البحيرة

علشان تخدمه لكن لاقتة اتاخر ، فرجعت للزوجة اللي اندهشت

بسبب اختفاء العشيق ، لكن ظنت أنه ممكن يكون غفل الخدامة

ورجع للمدينة فرجعت هى كمان للمدينة ومعها الخدامة

فى الفترة دى كان الكاهن (أوبا أونر) ملازم للملك (نب كا) لمدة

سبعة أيام لخدمته وتقديم النصائح الخاصة ، وطول المدة كان

العشيق موجود فى قاع البحيرة ، أما خادم البيت فراح للكاهن

(أوبا أونر) وقاله بأنه نفذ كل اللي أمر به.

(أوبا أونر) راح للملك (نب كا) وقاله :

"ممكن لجلالتك أنك تيجى معايا وتشوف عجيبة حصلت فى عهد

جلالتك؟"

استغرب الملك (نب كا) وراح فعلا مع (أوبا أونر) للبحيرة وهناك

نادى الكاهن (أوبا أونر) على التمساح وأمره أنه يجيب العشيق من

تحت المياه فظهر على سطح الماء .

الملك (نب كا) خاف من منظر التمساح فمد (أوبا أونر) ايده

ومسك التمساح فتحول لتمساح من الشمع مرة تانيه

وحكى (أوبا أونر) قصة زوجته الخائنة مع العشيق على الملك

(نب كا) ، وطلب من الملك أنه يحكم عليهم ، فقال الملك (نب كا)
للمساح خده (يقصد العشيق)

اتحول التمساح من شمع لحقيقى وأخذ العشيق وغاص به فى
البحيرة وقتله ، أما الزوجة الخائنة فقرر الملك (نب كا) أنها يتقبص
عليها وعند حقول الذرة الموجودة شمال مقر الحكم يتم إشعال
النار فيها وإلقاء رمادها فى النهر.
وانتهت القصة على كده

عاوز اقول لحضرتك أن كل الخمس قصص الباقين برضه كانت
بسبب الخيانة أو القتل ومعظم اللي حصلت معاهم كانوا كلهم
كهان ما عدا شخص واحد كان قائد جيش
و كمان مع بحثى فى التاريخ المصري القديم اكتشفت أن الكاهن
(اوبا اونر) ملهوش مقبرة أو خلينى اقول محدش لقي مقبرته لحد
دلوقتى ، حضرتك تفتكرى أن (اوبا اونر) هو واحد من الموجودين
فى التوابيت اللي هنا ؟

انا عارف انى طولت عليكى ، بس اعزىنى كان لازم احكيلك حكايتى
من اولها واحكيلك كمان على السر أو نعتبر جزء منه ، وبعد الكلام
الطويل ده خلينى احكيلك مشكلتى .

أنا اتعلمت النحت من ابويا زى ما حكيتلك فى أول خطاب ، كنت

بعمل شوية تماثيل كده صغيرة من الشمع وكنت بعرضهم على
ابويا وامى ، ومع الوقت اتحسنت موهبتى وبقيت اعمل تماثيل
غاية فى الروعة ... تماثيل فرعونية ومتلونه كمان بالالوان الذهبية
وكنت ببيع شوية منها للبازارات السياحية اللى موجودة فى
الفيوم .

لكن محطتش فى اعتقادى أبدا أن فى يوم هتبقى الموهبة دى
سبب سعادتى وتعاستى فى نفس الوقت .
بعد اللى حصل مع (دينا) قعدت فترة مخنوق وحالتى النفسية
كانت وحشة

لما الباب ظهر فتحته ونزلت ، ولاقيت التماسيح مش موجودة
كانوا تحت المياه ، جمعت شوية شمع وبدأت امارس موهبتى فى
النحت ، وخلصت أعظم تمثال فى الدنيا بعد 8 ساعات
تمثال (دينا)

عملت تمثال يشبه دينا جدا بفستان وردى جميل ، ايه السبب اللى
خلانى اعمله ؟ ... تصدقينى لو قولتلك معرفش ، ولا حتى فاكر انا
عملته ازاي ؟ انا كنت سرحان فى ذكرياتى معاها والايام الجميلة
اللى عشتها وهى موجودة فى حياتى ، ولما فقت من سرحانى
لاقيت التمثال دة فى وشي ، مسكت الفاس وحاولت اكسره لكن

قلبي مسمحش بكده وايدى رمت الفاس وطلعت اجرى على فوق
وعينيا كلها دموع .

بعد يومين ابويا نزل تحت علشان يجهز كميه شمع وشاف التمثال ،
انبهر جدا بجماله وفى نفس الوقت اتضايق لانه عرف أن لسا دينا
ليها مكان فى قلبي ، ولأن التمثال كان فى طريق ابويا فشاله
وحطه جنب الجدار الغربى للمكان واخذ الشمع اللى محتاجه
وطلع وقالى أنه ركن التمثال عند الجدار الغربى ، فقولتله انى عاوز
اكسره ، ابويا ابتسم ليا ابتسامة باهته وطبطب على كتفي وسبنى
ومشى .

تانى يوم الباب ظهر ونزلت ومسكت الفاس وقررت اكسر تمثال دينا ،
لكن بعد ما وصلت للتمثال لمحت تمساح قاعد اودام البحيرة
ومبيطلعش نفس قربت منه شويه لاقيته مات فعرفت أن بعد ثوانى
هيتحول تانى لشمع وهيسبلى جلده وسبيكة الذهب إياها .
وفجأة ...

سمعت صرخة

بصيت ورايا لاقيت حد بيجرى طالع على السلالم جريت وراه لحد ما
لاقيت امى اودامى ، سألتها مين اللى صرخ كده ، قالتلى هى كمان
سمعت صوت الصرخة لكن متعرفش مين وكل اللى لمحته حد

بيخرج من باب البيت .

طلعت أجرى لحد ما لاقيتها ...

(دينا)

أو خلىنى اكون اكر وضوح اللى لاقيته هو تمثال (دينا) ، لاقيت
التمثال واقف اودام باب الجنينة اللى بيودى على الشارع ، وكان
التمثال فى وضعية الجرى ووشها مليان رعب وخوف ، هنا حسيت
أن فى حاجة غلط ، معقول اللى انا بفكر فيه حصل ؟
شلت التمثال على كتفى ومجرد ما دخلت البيت لاقيت حد بيضربنى
على كتفى وبتصرخ وبتقولى نزلنى .. نزلنى .

اتخضيت ورميت اللى على كتفى على الأرض ، لاقيتها (دينا) ، دينا
بشحمها ولحمها وبتصرخ وبتقول (انتم عاوزين ترمونى للوحوش)
وطلعت تجرى برة البيت ، المرة دى مطلعتش أجرى وراها ، كنت
عارف ايه اللى هيحصل .

وفعلا حصل

اودام باب الجنينة اتحولت لشمع تانى ، كأنه غير مسموع ليها
بالخروج من البيت ، وروحت شلته تانى واتكرر كل حاجة تانى ، لكن
المرة دى نزلت بيها على المكان ، ومهتمتش بأى حاجة ، وبالرغم من
صراخها ودموعها وخوفها اللى كان باين عليها لكن كنت قاسى

معاها ، كنت عارف فى النهاية أنها تمثال من شمع ، لكن أتحوّلت
بشرية ازاي ؟ ، ده السر اللي فهمته بعدين

بعد ما ربطت دينا روحك عند المكان اللي ابويا حط فيه التمثال
وحاولت اقرا النقوش المكتوبة ، لكن كانت صعبة جدا لانها كانت
مزيج من الهيروغليفية و الديموطيقية ، وكل اللي قدرت أفهمه
جملة واحدة بس .

(اعطنى مما تملك يا اوزاريس)

كل اللي قرا فى التاريخ المصري القديم عارف ان اوزاريس هو ملك
العالم السفلي ، روحك لتمثال دينا أو خليتا بقى نقول عليها دينا
على طول ، ومسحت دموعها وحاولت أهدئها ، وسألتها سؤال كان
مهم جدا :

- انتى آخر حاجة فاكراها ايه ؟

قالتلى انها فاكدة لما كانت رايحة الحمام علشان تغسل ايديها
وفجأة لاقيت باب غريب ، فتحته ودخلت ونزلت سلام بسبب فضولها
ولأنها كانت بتحسب أن المكان ده مقبرة وان احنا عصابة بتهرب اثار
لكن مجرد ما شافت التماسيح خافت وطلعت تجرى .
هنا انا فهمت كل حاجة ..

تمثال دينا بسبب وجوده جنب الجدار المنقوش عليه التعويذة ،

التعويذة اتسببت بطريقة أو بأخرى فى انها تحول تمثال دينا لبشرية وان آخر حاجة فاكراها هى التفاصيل الأخيرة إالى حصلت فى بيتنا ، ممكن يكون البيت والمكان هما السبب فى كده وأنهم احتفظوا بالتفاصيل إالى ساعدت التعويذة فى تشكيل شخصية التمثال وتحولها لبشرية .

قعدت مع دينا وفهمتها كل حاجة وحكتلها أنها تمثال من شمع واديتها دلانل كتير بتثبت كده وان أهمها أن انا خليتها تسمع صوت دينا الحقيقية على المحمول بعد ما اتصلت بيها من رقم غريب ، وكمان عطيتها فرصة تهرب وقولتلها أن انا هديها فرصة تهرب وهصورها فيديو ساعة حدوث كل حاجة ليها . وبعد ده كله اقتنعت ...

وبعد ده كله بقت دينا معايا وبقت تحب التماسيح وبصراحة كنت فرحان جدا لان اخيرا دينا إالى كنت بتمناها بقت معايا ، انا عارف انها من شمع يعنى لا هتاكل ولا هتشرب ولا تنفع لأى حاجة هى مجرد صوت وحركة وشويه مشاعر بسيطة لكن مكنتش مهتم لأن فى النهاية هى معايا ، ومع مرور الوقت بدأت اخاف من حاجة لان فى حاجة مهمة نسيت اقولها لك .

معدل عمر تماسيح الشمع من 6 شهور الى 9 شهور وبعدها بيرجعوا شمع تانى ويظهر بعدها ومن الشمع برضه تمساح صغير ، و (دينا)

اللى من الشمع بقالها كده شهرين بالضبط فى اليوم اللى بكتبلك
فيه الجواب ده تفكرى ايه اللى ممكن يحصل مع (دينا) ؟

آدم عبد الستار

5/3/2018

استاذة عادة المفروض أن انا كنت ابعتلك الجواب فى التاريخ
اللى كتبتھولك فى الاول ، لكن بصراحة خفت لتقولى عليا مجنون ،
أو تفشي بالسر بتاعى ، وركنت الجواب فى درج مكتبى ، لكن اللى
حصل بعد كده خلانى أقرر ابعتلك الجواب ، وحتى لو السر اتعرف انا
كمان مبقاش يهمنى ، كنت آخر حاجة قايلھا لك أن عمر التماسيح
الشمع ييقعد من 3 شهور الى 9 شهور ، وان تمثال (دينا) بقاله
كده شهرين ، لكن عدى ال 9 شهور و(دينا) متحولتش تانى لشمع ،
فقولت يمكن علشان هى مش تمساج وانھا بشرية ممكن تكون
المسألة مختلفة ، لكن اللى حصل بعد كده مكنش متوقع نهائى
النهاردة امى راحت المدرسة علشان (آيه) اختى كانت تعبانه وكانت
عاوزه تاخذھا إجازة من المدرسة ، وهناك قابلت الزائرة الصحية
وبعد الدردشة والسلام امى عرفت أن الزائرة الصحية اساسا من
المنيا ولما امى جابت سيرة (دينا) طلعت الزائرة الصحية تعرفھا
لأنھا من نفس منطقتها ، وقالتھا أن (دينا) ماتت .
بعد ما اتغديت مع اھلھا دخلت نامت ، وعلى صلاة العشاء امھا
دخلت علشان تصحبھا لاقتها فارقت الحياة ، وكان جمبھا على
السرير شويه شمع سايج ... تفكرى ايه اللى حصل ؟

آدم عبد الستار

12/2/2019

والآن يا اصدقائي لقد انتهى خطاب (آدم) وقصته الغريبة ، فهل
لدى أحد منكم تحليل عما حدث ؟
إذا توصل أحدكم إلى تحليل منطقي لا تبخلوا علي به ، ولا تنسوا
صديقتكم الدائمة (غادة ممدوح الفيومي)

انتهت بحمد الله

اعمال صدرت للكاتب :

- لعنة الزمردة "أسرار الثعلب" ... رواية

- البداية "لعنة الزمردة 2" ... رواية

- تعويذة الحياة ... قصة قصيرة

أعمال تحت التجهيز :

- القربان "لعنة الزمردة 3" ... رواية